

COMUNICATO n. 925 del 24/04/2024

Traduzione in mòcheno

"Fit4Co", en Eirta van Euregio de zboate edizion van programm va de zòmmòrbet aus de grenz

[Mòcheno] Kan haus Moggioli, en sitz van Euregio ka Trea't, en eirta as de 23 van oberel ist kemmen vourstellt de zboate edizion van programm Interreg "Fit for cooperation", zuazolt va de Europeisce Union, as bart gem de moglechkait en de òllgamo' amministrazionien, en de sozial toal ont en de regional management za vergreasern de projektn aus de grenz. De toalnemmer hom gameicht kriang nochrictn bail der trèff as hòt se gahòltn en de vria bail der "Eirta van Euregio". Bail der trèff sai' kemmen vourstell a toal paispiln va best practice va de vouter edizion ont de haup sochen va de doi zboate edizion. Men mu' vourstelln de nain idee va projekt finz as de 15 van heibeger 2024.

En trèff hòt toalganommen gor der asesor ver de naiòrbetn ver en haus, ver en pahalter gamoa' ont ver en lòngh kennen de Autonomi va de autonome provinz va Trea't, as hòt derstellt de bichtekait va de òrbet gatu' en de iarder ver de zòmmòrbet iber de grenzn ont abia de drai' eirter sai' iaz mear verpunftn ont hom gamòcht toalnemmen mearer lait. Euregio, ist òlbe gaben toal van doi ourt ont hòt pfunftn an nain vurm, noch de zaitn, ver za klaum au der enteress va òndra kategori, nèt lai van innrichtn, ver za vòngen u' pet naia zòmmprojektn. De inger Autonomi muast vil òrbetn avai s ist nèt leicht pet de gamoa'schòft as mi't ont as ist òlbe mear gleich ont verpunftn.

De zòmmòrbet en Euregio zbischn Tirol-Sudtirol-Trentin hòt groasa tritt envir gamòcht gèltsgott en de projektn as guat gòngen sai', abia de euroregionalnochrictn van schneala'n (<https://valanghe.report/bulletin/latest>) oder de Euregio-Tickets ver en lokalverkear (<https://www.europaregion.info/it/euregio/progetti/mobilita-trasporti/euregio-ticket/>). En rom van zboate trèff van program Interreg "Fit4Co", iaz s ist moglech enviretrong naia projektn pet de hilf van auskennetlait.

"Fit4Co gip en de toalnemmer de moglechkait za òrbetn iber en de transfrontaliartn temen pet de zòmmòrbet va professionistn en rom van project management, van projektzuazol ont va de interkulturalòrbet. De doin projektn gem an bichtegen paitrog za versterchern de zòmmòrbet en Euregio ont za gea' iber en de grenzn", sok Elisa Bertò va de òllgamoakanzlai van Euregio.

De doi naikait hòt zaruckgem mearera projektn as guat gòngen sai', abia "Sproch Inn" iber en de bersntoler minderhait en Trentin, ver de beil as hòt Leo Toller van Bersntoler Kulturinstitut klòfft, der Master Euregio, s verpersern van u'stelltn ont der verglaich zbischn de òllgamo' amministrazionien, vourstellt va de viareren van TSM - Trentino School of Management Paola Borz oder abia "Digiway" ver de sicherkait en pèrg, vourstellt va Arezia Ronchini van Dinst ver en turismus ont sport va de Provinz va Trea't.

"De doin projektn as guat gòngen sai' van earste mol van Fit4Co, mòchen verstea' as de transfrontaliarte zòmmòrbet pet an strukturiartn plan ont de hilf va auskennetlait funziarn mu. Ber sechen nea'mer de

stunn za krieg vourtschbinnen va projekt ver en doi mol va Fit4Co. S kemmen u'ganommen òlla de projektn as belln versterchern de zòmmòrbet zbischn lender, en zòmmlem ont ver de birtschòft en Euregio. S hòt koa' grenzn en de kreativitet en aigene rom va kompetenz", hòt derzuatsòk Matthias Fink, koordinator van projekt Fit for Cooperation.

“Abia tsòk, de a'nungen va projekt “Fit4Co” meing vourstellt kemmen finz af de 15 van heibeger 2024 en de adress www.fit4co.eu.

S kemmen inngalont za trong envire transfrontaliartn projektn, òlla de òllgamoà'amministrazionien, de zòmmlemtoaln ont de regional management van Euregio Tirol-Sudtirol-Trentin, va Kernten, van Veneto, van Friuli-Venezia Giulia (toalnehmer van Euregio A'ne Grenz) ont van Land Salzburg.

Dinstletratt kuriart van Druckomt va de Autonome Provinz va Trea't.

Do der arkiv pet de pilder ont de vrogk kuriart van Euregio:

<https://drive.google.com/drive/folders/1KqSPISQDrMcVO6TXJtZhdDoKZ1DJYgoz?usp=sharing>

<https://www.youtube.com/watch?v=GtDDISCMdY0&t=7s>

<https://www.youtube.com/watch?v=x9OZS84Tsg>

Ibersetz gamòcht van Sprochtirl va de Tolgamoà'schòft Hoa Valzegu' ont Bersntol

(cdt)